

Limiar

Coa ollada na popa dos dezasete anos de singradura literaria e divulgativa de temas mariñeiros, sociais e históricos da nosa vila e doutras lideiras culturais máis aló do noso ámbito, somos conscentes de que o noso sustento é tan feble como o asteleiro de Purro cando ninguén daba un can por el. Mais, este é hoxe un dos emblemas da cultura marítima de Bueu, xunto co Museo Massó e outras iniciativas institucionais e particulares que colocan a Bueu como un importante punto referencial e imprescindible para o coñecemento da mesma.



Mosaico do Faro de Ons

A este labor de reconstrución e construción cultural e ao fortalecemento da nosa esencia mariñeira xa hai anos que a Asociación Cultural “Os Galos” tén contribuído abondo, de xeito material e humano, non sempre debidamente valorado.

Un ano máis, e pese ás onerosas dificultades de edición da súa Revista anual que xa chega ao número 18, esta volve un ano máis, a saír á rua grazas ao afouto labor dos seus colaboradores que contribúen con traballos de investigación exclusivos sobre a nosa área de influencia, creacións literarias e pictóricas de ámbito local, artigos de divulgación, recensións culturais...

Ao tempo que a nosa Asociación procura manter o espírito fundacional de recuperación material e tamén espiritual da nosa cultura mariñeira, sacándoos dun esquecemento e desaparecemento anunciados, esta pode gabarse de ser pioneira neste esforzado labor de anos que hoxe pode gozarse no porto de Bueu como un práctico e activo museo flotante, complemento físico da historia dunha vila, esencialmente mariñeira desde as súa orixes.

A nosa revista non é máis que un soporte e proxección da actividade cultural da Asociación Os Galos, procurando manter a través das colaboracións a esencia milenaria de Bueu e as suas xentes co mundo do mar, acollendo ademáis outras recensións interesantes da cultura actual.